

那文毅公奏議

那文毅公初任直隸總督奏議卷四十四目錄

卷四十四

懇恤民瘼

調劑鼓鑄

懇准商場出租

請借運本

恭報雨雪

那文毅公初任直隸總督奏議卷四十四

嘉慶十九年三月十二日
獻圖書館藏

男容安恭輯

懇恤民瘼

嘉慶十九年三月十二日

奏爲恭懇

聖恩事竊照嘉慶十八年九月二十三日欽奉

上諭首逆劉林卽林清本日廷訊盡法懲治寸磔傳首其
妻子親屬等均一一按名捕獲照例緣坐鉅案已結毫無株連念附近良民因此等奸宄滋事間致失所朕斷不肯因近郊有數十里民稍減愛憐赤子之心著施恩

將大興宛平二縣本年應徵錢糧全行豁免以示憫恤
欽此又奉

上諭直隸長垣開州東明三州縣現被賊匪滋擾該三州
縣士民隨同地方官悉力抵禦保固城垣並捐資募集
壯丁於各村莊共相守衛士民之急公尙義甚屬可嘉
該三州縣連年收成本未豐稔茲又經匪徒騷擾深堪
軫恤著加恩將長垣開州東明三州縣本年應完新舊
錢糧並借給本折口糧倉穀等項概予豁免欽此仰見
皇上軫念善良

獎勵义勇之至意當經前署督臣章煦敬謹臚黃遍行張

貼該縣等紳民士庶感戴

恩施無不同聲歡頌

由

伏查定例蠲豁錢糧如地方偶被

水旱災傷俱按災分輕重將正耗並蠲如恭逢

皇上謁

陵

巡幸以及

恩詔豁免則僅免正銀其耗銀仍應徵納茲欽奉

恩旨將大興宛平二縣十八年錢糧並長垣開州東明三

州縣十八年應完新舊錢糧並借給本折色口糧

倉穀等項全行蠲免係因逆匪滋擾又值年歲歉

收仰蒙

皇上

特頒

恩旨似與尋常豁免不同所有大興宛平長垣開州東明
等五州縣奉

旨豁免錢糧合無仰懇

聖恩俯准照災蠲之例將隨徵耗銀一併豁免俾民力益

可寬紓仰沐

鴻慈更無既極謹

奏

嘉慶十九年三月十四日奉

上諭那彥成奏請將豁免錢糧之大興宛平二縣及長垣開州東明三州縣應完隨徵耗銀一體豁免一摺大興宛平二縣前因查辦逆案恐附近良民間致失所降旨將該二縣上年應徵錢糧豁免其長垣開州東明三州縣士民隨同地方官保護城垣又值連年荒歉亦將該州縣等上年應完新舊錢糧並借給本折口糧等項概予豁免此次蠲免錢糧原因軫念民艱特加恩資所有該五州縣應免錢糧著加恩將隨徵耗銀一體豁免俾民力益臻寬裕用副朕惠愛黎元至意該部知道

嘉慶十九年三月二十九日

奏爲查明上年災歉各州縣應徵新舊糧租恭摺奏懇
聖恩分別展緩以紓民力事竊照直隸邢臺等州縣上年
秋禾被旱被水被雹開州東明長垣三州縣被賊
滋擾共四十八州縣災難民人節蒙

恩旨將應徵錢糧等項分別蠲緩豁免並給賑卹今春又
蒙

加恩展賑及賞給出借口糧交春以來大名府屬之開州
東明長垣等處捐設粥賑小民就近領食均資果
腹現又動撥賑餉派給奉米領運散放及時接濟

聖慈凋疊莫不同聲感頌查邢臺等州縣應徵十八年以前地糧等銀有應緩至本年秋後啟徵者亦有緩至本年麥後徵收者其十九年應徵新糧旗租不在緩徵之列例應徵收惟連年災歉元氣未復體察輿情艱於完納又獲鹿安平二縣上年秋收未能豐稔冬春雨雪稀少所種二麥未能滋長民力亦屬拮据自應酌量調劑伏查開州東明長垣三州縣十八年以前新舊錢糧等項欽奉上諭全行豁免又邢臺等州縣十八年錢糧等項例應緩至秋後啟徵者均毋庸議外理合奏懇

聖恩將開州東明長垣邳臺霸州定興新城完縣南和平
鄉廣宗鉅鹿任縣邯鄲肥縣曲周廣平鷄澤威縣
隆平宣晉等二十一州縣應徵十九年錢糧並倉
穀等項緩至本年秋後啟徵其餘文安東安清苑
唐縣束鹿安州故城青縣靜海滄州鹽山沙河唐
山內邱永年成安磁州元城大名南樂清豐龍門
冀州南宮新河棗強曲陽等二十七州縣又現應
開徵之獲鹿安平二縣應徵十九年暨十八年以
前新舊糧租並借欠倉穀等項一並仰懇

天恩一體緩至本年秋後啟徵紓民力再此外如尚有

續報應緩之處容臣另行具奏謹

奏

嘉慶十九年四月初一日奉

上諭那彥成奏查明上年災歉各州縣應徵新舊糧租懇
恩分別展緩一摺直隸邢臺等州縣上年秋禾被災並
開州東明長垣三州縣被賊滋擾業將應徵錢糧等項
分別蠲緩茲據該督查明各州縣或連年歉收或冬春
雨雪稀少民力仍不免拮据著加恩將開州東明長垣
邢臺霸州定興新城完縣南和平鄉廣宗鉅鹿任縣邯
鄲肥鄉曲周廣平鷄澤威縣隆平宣晉等二十一州縣

應徵十九年錢糧並倉穀等項俱緩至本年秋後啟徵
其餘文安東安清苑唐縣束鹿安州故城青縣靜海滄
州鹽山沙河唐山內邱永年成安磁州元城大名南樂
清豐龍門冀州南宮新河棗強曲陽等二十七州縣及
獲鹿安平二縣應徵十九年暨十八年以前新舊糧租
並借欠倉穀等項一並緩至本年秋後啟徵以紓民力
用副朕施惠窮黎有加無已至意該部知道摺並發

嘉慶十九年三月二十九日

奏爲大名府屬災難貧民分別展賑煮粥接續散放地

方極臻靖謐仰紓

聖厪事竊照大名府屬元城等七州縣上年秋禾被旱開
州東明長垣三州縣又被賊匪滋擾仰蒙

皇上

鴻慈分別蠲豁賑卹并於新正

特頒

恩旨

加賞口糧小民渥沐

恩施無不同聲感頌

臣

於正月間赴開州等處巡閱目睹

情形尙有應須接濟之處商令藩司素納等在於

開州東明長垣三州縣境內煮粥隨與前署督

臣

章煦及司道府等議捐養廉銀一萬五千兩設廠
辦理經章煦恭摺奏

聞在案茲據大名道屠之申大名府知府劉寶第稟稱開
州東明長垣三處自二月間煮賑至今已逾兩月
近日連次得有雨澤小民已可備趁食粥人數口
漸減少擬至三月底停止將領回口糧折色銀兩
開廠散放本色米石不日亦可運到一俟放完折
色卽放本色其元城大名南樂清豐四縣口糧本
折米銀業已放竣現距麥秋尙早已分設粥廠煮
賑接濟繼以接至麥秋爲止察看民情甚爲歡悅

地方極臻靖謐該四縣境內亦俱得雨可以播種
大田現有缺乏籽種牛具之戶呈請借助俟彙齊
核辦等情臣查元城等七州縣連歲歉收而開州
東明長垣三處上年又遭兵燹民情實屬困苦仰
蒙

聖主疊次

加恩多方賑恤小民始不致失所節經臣諄飭該道府督

率各屬實力散放務使實惠及民現在開州等處

接放口糧臣自當再加諄飭密差查訪倘有尅扣

侵蝕情弊立即嚴行參究至大名府屬均已得雨

南樂縣已經深透正可及時播種大田所有缺乏籽種牛具之戶自應欽遵前奉

諭旨照例借給以資耕作

臣仰蒙

恩命

畀以畿輔重任惟有事事實心經理以仰副

殊

自行相付何事不治但恐故犯因循疲玩之病耳勉之

皇上惠愛斯民之意再臣與章煦等所捐煮賑銀一萬五

千兩不敷動用經臣飭令各州縣勸諭紳民量力

捐助今據稟稱該紳民等均能急公慕義踴躍捐輸實堪嘉尚容俟煮賑事竣查明紳民捐助米石多寡分別等差奏懇

施恩獎勵謹

奏奉

硃批覽奏稍慰

嘉慶十九年三月二十九日

奏查直省因連年灾歉米糧稀少價值增昂現據各屬稟請減糶前來其倉儲有備者即可及時減糶惟存倉米穀無多之處不敷動支因思上年卸貯天津北倉奉米應還通倉米五萬石內除奉省尙未運到并抵撥易州

西陵需用粟米直隸保定等處駐防兵米之外尙餘米二

萬二千餘石合無仰懇

皇上格外

恩施

俯准留於直隸作爲各屬減價平糶之用謹

奏

嘉慶十九年四月初一日奉

上諭那彥成奏將天津北倉卸貯奉米撥給二萬二千餘石懇請留直平糶等語直隸省現在米價增昂各州縣應需平糶之處甚多着加恩將上年卸貯天津北倉奉米應還通倉米石內除尙未運到并抵撥各處支用外

餘存米二萬二千餘石均留於該省作為各處減價平糶之用該部知道

嘉慶十九年五月二十九日

奏為查明大名府屬紳民捐輸煮賑銀米數目分別等差恭摺奏懇

聖恩以示獎勵事竊查大名府屬州縣上年秋禾被旱開州東明長垣三處又被賊匪滋擾所有災難貧民仰蒙

鴻慈賑卹

加賞口糧均已渥被

恩膏無虞矣所惟今春青黃不接之時尙有乏食窮黎以

及外來流丐必須酌量接濟以資餬口經臣與前

署督臣章煦并司道府等議捐養廉銀兩在於開

州東明長垣三州縣境內設廠煮賑嗣因元城大名南樂清豐四縣於散放口糧之後距麥秋尙早仍飭大名道屠之申大名府知府劉寶第於該四縣一體勸捐設廠煮粥業已先後奏

聞惟是臣等所捐養廉共止一萬五千兩本不敷七州縣

煮賑之用曾於商議煮賑之初飭該州縣出示勸諭本地殷實紳民不拘銀米酌量捐助事竣加以

獎勵旋據各州縣陸續稟報有捐納同知胡鑑堂等或捐米石或助銀兩甚爲踴躍均經臣批令彙案詳辦並於具奏元城等四縣開設粥廠摺內陳明在案茲查大名府屬二麥刈穫登場民間已有口食開州等三州縣粥廠於三月底停止元城等四縣粥廠於四月底停止除南樂清豐二縣並無紳民捐輸外其餘開州等五州縣捐輸紳民據大名道屠之申查明該紳民胡鑑堂等三十一名捐助銀米數目開單詳奏前來臣查胡鑑堂等誼篤桑梓各捐銀米煮賑俾待哺貧民均資果腹實堪

嘉慶十九年六月二日奉

卷四十一

嘉尚似應奏請

恩施以示優獎謹酌定等差開列清單恭呈

御覽合無仰懇

聖恩分別

賞給議叙頂戴以爲急公慕義者勸再捐輸銀米無多之
紳民已飭大名道府給予匾額示獎謹

奏奉

硃批所請太覺冒濫朝廷名器豈那彥成市恩之具耶另

有旨

嘉慶十九年六月初二日奉

上諭那彥成奏查明大名府屬捐輸煮賑紳民懇請獎勵一摺上年大名府屬州縣被災地方窮黎乏食該紳民誼敦任卹捐輸銀米拯濟鄉閭原係義所當爲卽地方大吏嘉其好善樂施奏請獎勵亦當示以限制名器豈容濫所有單開之候選同知胡鑑堂候選教諭李叙曾候選縣丞李友曾着加恩交部議叙其捐米一百石之朱堦郭允淇胡德隆董克忠胡郁文王克念傅永年李連喜石培金賴成德金盤銘李元欽劉天香捐銀四百兩之朱漢書劉士奇張蘭坡俱着賞給八品頂戴其捐米五十石捐銀二百兩者均無庸議該部知道摺單

并發

嘉慶十九年五月初七日

奏爲恭懇

聖恩減價平糶以裕民食事竊查直隸邢臺等州縣上年秋收歉薄米糧稀少價值昂貴必須減價平糶方可以裕民食前經奏請將天津北倉餘存奉米二萬二千餘石留於直隸作爲平糶之用仰蒙

恩旨允准經臣行司欽遵知照在案伏查定例荒歉之年各督撫當確查實在情形將必須減糶若干始與民食有益之處一面奏

聞一面辦理今邢臺等州縣市集次粟米價竟有賣至五兩以上者若不減價平糶勢必日見增昂民間買食未免愈覺艱難茲據藩司素納詳請援照嘉慶十四十六等年奏明減糶之案按市集次粟米價在一兩八錢至二兩者每石減銀二錢二兩以上至二兩五錢者每石減銀三錢二兩六錢至三兩者每石減銀四錢其三兩以上未免過昂不必按價遞減每石總以二兩五錢定價出糶其數在一兩八錢以內者仍照常例每石減銀一錢毋庸再請議減如此區分辦理糧價似可漸就平減於民

食大有裨益所需米石在於

恩賞餘存奉米內酌量派撥赴津領運照此減價平糶如
各該州縣倉儲充裕或有隣近州縣可以協撥應
飭令就近動用以省運脚臣仍飭各該州縣嚴禁
市僧囤販並胥役人等滋弊以期實惠及民仰副
聖主愛養斯民之至意謹

奏

嘉慶十九年五月初九日奉

上諭邵彥成奏請減價平糶以裕民食一摺前因邢臺等
州縣上年秋收歉薄糧價較昂准將天津北倉餘存奉

米二萬二千餘石留於直隸平糶茲據該督奏查明邢臺等州縣市集次粟米價有賣至五兩以上者亟應減價平糶以濟民食着照所請米價在一兩八錢至二兩者每石減銀二錢二兩以上至二兩五錢者每石減銀三錢二兩六錢至三兩者每石減銀四錢其三兩以上毋庸按價遞減每石總以二兩五錢定價出糶其數在一兩八錢以內者仍照常例每石減銀一錢所需米石卽於餘存奉米內酌量派撥赴津領運區分減糶如各該州縣倉儲素充或鄰近州縣可以協撥卽就近動用以省運費該督務督飭各州縣實心經理嚴禁胥役市

偷侵漁囤積以期實惠及民該部知道

嘉慶二十年四月初五日

奏爲大名南樂清豐等三縣沿河積潦村莊歷年緩徵

錢糧恭摺奏懇

聖恩俯准豁免以紓民力事竊照大名南樂清豐三縣因
嘉慶十年衛河上游南岸決口以致該縣等沿河
七十餘村莊地畝被水淹浸每年應納正耗錢糧
蒙

恩照例緩徵在案上年據大名道屠之申勘明形勢擬於
大名縣之北善村清豐縣之南留固等處挑挖溝

渠將各該村積水洩注潭坑引入黃河故道由元
城縣小灘地方引歸衛河詢之各村民情愿自行
出夫分段挑挖並請官爲彈壓等情繪具圖說稟

經臣奏奉

諭旨積水淹浸田畝鄉民自愿疏消以利耕種自應俯順
輿情令其興辦該督飭知地方官妥爲彈壓勿令胥吏
人等藉端滋擾欽此當卽轉飭遵照嗣據該道屠之申
詳稱督飭各地方官傳集村民按照錢糧多寡均
勻出夫分段挑挖自五月二十日開工起至八月
十五日止挑挖完竣一律通暢積水已由黃河故

道滙注元城縣小灘地方仍歸衛河水路原被水
占地畝全行涸出並請將嘉慶十年至十八年各
村糧賦共緩徵正耗銀一十萬四千四百七十一
兩零懇

恩豁免等情臣查大名南樂清豐三縣積潦村莊地畝既
將積水疏消地已涸出所有歷年舊欠自應完納
以重

國賦未便請豁當經駁飭催令追解去後茲據大名道
屠之申詳稱當經出示曉諭并飭大名等縣上緊
催徵今據各該村鄉民咸以附近河濱地本瘠薄

復因水佔失業已閱九年之久實與偶被偏災不
同且有遷移在外之家甫還故土尤爲艱窘今幸
薄收稍資餬口若積欠錢糧全須完納實形竭蹶
籲求逾格矜憐并據大名等縣以被淹涸出村莊
應完舊欠糧銀節經催迫仍未完納訪察民情實
因力有不逮并非無故拖欠等情由該道並藩司
轉詳前來臣覆加體察該村民被淹疾苦本屬實
在情形現在地雖涸出而積欠已有九年之多實
係積欠在民當此元氣未復之時若一概徵輸民
力實有不足可否仰懇

天恩將大名南樂清豐三縣被水村莊自嘉慶十年起至十八年止未完地糧正耗銀十萬四千四百七十餘兩

恩予全行豁免俾民力稍紓得以盡心隴畝則共慶生成益沐

鴻慈靡旣如蒙

俞允再將村莊糧戶應免數目造冊送部查核謹奏

嘉慶二十年六月初一日奉

奏爲查明大名等三縣積澇村莊歷年緩徵錢糧民力

駁難輸納恭摺奏懇

聖恩再予展緩事竊

臣

承准軍機大臣字寄欽奉

上諭那彥成奏請將大名南樂清豐等三縣沿河積潦村莊歷年緩徵錢糧懇恩全行豁免一摺向來各省偶遇偏災經該督撫等奏請蠲緩朕無不立予恩施此次那彥成所奏大名等縣前被積水淹浸地畝業已䟽消涸出失業之民俱有可耕之地並非現值災歉何得遽請將舊欠錢糧全行豁免所奏難以准行著該督再詳加察看如該村莊地畝甫經涸出民氣未復驟將九年積欠同時並徵民力實有不逮或量分年限請予展緩尙

屬可行俟該督查明具奏到日再降諭旨欽此仰見
皇上於慎重正賦之中仍寓

惠愛黎元之意當卽欽遵飭查去後茲據藩司錢臻轉據
大名道屠之申查明具詳呈請奏懇

聖恩再予展緩前來臣伏查大名南樂清豐等三縣沿河

七十餘村莊地畝因嘉慶十年衛水倒漾全被淹
沒嗣於十二三四五六等年連被水災以致積澇
未涸小民失業已歷九年之久上年經大名道勘
明形勢勸諭被淹各村莊民人挑挖溝渠始將積
水引歸黃河故道與偶被水淹旋即消涸者輕重

懸殊現據該司道查明該三縣沿河村莊地畝雖已涸出惟被淹年久隴畝不分兼有水冲沙壓之處已與荒灘無異必須逐漸開墾培植方可一律布種以期有秋刻下卽有種植禾稼之處亦屬不成片段小民積困之後所收糧食尙不敷完納新賦養贍家口實屬元氣未復所有歷年緩徵錢糧該司道察看民情驟難輸納自係實在情形合無仰懇

皇上格外

天恩將大名南樂清豐等三縣積澇村莊歷年緩徵錢糧

展緩二三年俟涸出地畝普律成熟再行察看民情年景議定年限

奏請帶徵以廣

皇仁而蘇民困謹

奏

嘉慶二十年六月初三日奉

上諭那彥成奏查明大名等縣積澇村莊歷年緩徵錢糧懇恩再予展緩一摺直隸大名南樂清豐等三縣沿河七十餘村莊地畝前因衛水倒漾全被淹沒嗣又連年被水積澇未涸上年始經挑挖溝渠將積水引歸黃河

故道茲據該督查明該處地畝被淹年久必須逐漸開墾方可一律布種著加恩將大名南樂清豐等三縣積澇村莊歷年緩徵錢糧再予展緩二三年俟涸出地畝普律成熟再分定年限奏明帶徵以紓民力該部知道
嘉慶二十年六月二十七日

奏爲查明二麥實在被旱歉收州縣應徵新舊錢糧懇恩緩至本年秋後啟徵以紓民力事竊照本年四月及五月初間據順天東路南路西路三廳并河間保定正定三府及冀深二直隸州所屬各州縣因雨澤愆期二麥被旱歉收先後稟請緩徵當經臣批司

轉飭確查詳辦一面於

題報二麥實收分數案內聲明俟各屬查覆到日再行
核奏在案茲據各該管府廳州查明所屬各州縣
境內所種二麥上年冬雪甚少本年自春徂夏雨
澤又復愆期以致麥苗黃萎未能長發直至五月
十二日以後始得透雨大田尙可播種二麥實已
歉收刻下正值青苔不接之時若將新舊錢糧照
舊催徵民力不無拮据應請轉請緩徵等情由藩
司錢臻覆核具詳請奏前來臣覆查無異理合奏
懇

聖恩將二麥被旱歉收順天府屬之通州武清文安大城
永清東安良鄉涿州保定府屬之清苑滿城安肅
定興新城博野望都容城蠡縣雄縣祁州安州新
安河間府屬之河間獻縣阜城肅寧任邱交河景
州正定府屬之正定獲鹿元氏贊皇晉州無極藁
城新樂冀州屬之武邑衡水深州並所屬之武強
等四十州縣應徵本節年錢糧旗租並出借倉穀
折色口糧等項一體緩至本年秋後啟徵以紓民
力謹

奏

嘉慶二十年六月二十九日奉

上諭那彥成奏查明二麥歉收州縣懇恩緩徵一摺順天等府屬州縣所種二麥上年冬雪未足本年三四月間缺雨麥收歉薄現雖澍雨霑足大田長發但新穀尙未登場若將新舊錢糧照例催徵民力不無拮据加恩著照所請將順天府屬之通州武清文安大城永清東安良鄉涿州保定府屬之清苑滿城安肅定興新城博野望都容城蠡縣雄縣祁州安州新安河間府屬之河間獻縣阜城肅寧任邱交河景州正定府屬之正定獲鹿元氏贊皇晉州無極藁城新樂冀州屬之武邑衡水深

州並所屬之武強等四十州縣應徵本年節年錢糧旗租並出借倉穀折色口糧等項一體緩至秋後啟徵以紓民力該部知道

嘉慶二十一年五月初八日

奏爲查勘正定等縣被雹情形據實覆

奏事竊

臣先據正定縣稟報該縣於四月十四日得雨

四寸未雨之先風雷大作帶有冰雹行路及耕作之人猝不及避間有傷斃人命當卽飛檄正定府率同該縣迅速查勘於四月十八日附片陳奏一面檄委候補道府陶樾賚帶銀兩會同查明傷斃

人口確數分別撫卹旋據藁滅贊皇靈壽元氏井
陘欒城等縣稟報毗連處所均間有冰雹內惟藁
城贊皇亦有傷斃人口之事臣復添派清河道韓
文綺馳往會同確實查勘隨於二十二日承准軍
機大臣字寄欽奉

上諭據另片奏正定縣於本月十四日風雷大作帶有冰
雹間有傷斃人命等語所奏殊未明晰冰雹至於傷斃
人命實屬罕事著該督卽行飭查是日冰雹起於何時
訖於何時雹形約有何許之大所傷人口共有幾名應
撫恤者卽行撫恤一并詳悉查明據實覆奏欽此又經

臣飛行該道府等欽遵詳查去後茲據該道府等稟稱查勘正定府城迤北一帶沙地居多種植二麥甚少現在麥苗均已秀實并無被雹之處惟東南西三路被雹五十二村莊二麥間有損傷各村民俱已補種棉花豆穀等項現在出土青葱詢據各鄉民咸稱一日正刻先起狂風繼以冰雹從西北而至雹形大至徑寸小者如豆約計一時有餘戍末亥初復得雨四寸是日午前天氣亢熱村民俱穿單衣力作一時走避不及內有被雹擊傷而死者亦有因風冷氣寒奔逃撲跌搏擊之下因

而氣閉致死者先後致斃共有九十一名口旋赴藁城贊皇二縣勘訊藁城縣被雹共二十四村莊贊皇縣被雹共七十八村莊其起風被雹得雨情形大畧與正定相同藁城縣各村傷斃二十八名口贊皇縣傷斃二名該縣等先已分別有力無力量加賞卹現經委員陶樑遵照劄飭查明被傷身死之家每戶又賞銀二兩已資接濟被雹地畝亦俱補種察看正定贊皇藁城三縣民情僉稱上年種麥之區一縣統計不過十分之三現在被雹之區一縣統計不過三分之一大田秋收並無妨礙

其被傷二麥之處早經各村民乘雨補種棉花豆
穀一律齊全訊無願借籽種之人其應完本節年
地糧照例爲被雹之村另請緩徵民力已紓輿情
安帖毋庸再行議卹至靈壽縣屬惟東南一帶南
寨二十餘村間有小雹麥禾受傷甚輕元氏縣屬
惟西鄉臺城三村間有小雹麥禾受傷亦輕井陘
縣屬惟東南鄉胡家灘二處間有小雹麥田並無
妨礙樂城縣屬惟東南鄉故意等二十四村間有
小雹麥苗不致歉收均可毋庸議卹請緩等情具
稟前來臣覆加詳核此次正定府屬之被雹各縣

惟正定藁城贊皇有傷斃人口之事業據各該縣
及臣派委韓文綺陶傑等先後撫卹接濟各該家
屬無不感戴

皇仁同聲臚頌其麥禾受傷之處俱因節氣尙早乘雨改
種秋禾止係一隅中之一隅至靈壽元氏井陘藁
城等縣間被小雹村莊俱因毗連之處犬牙錯雜
其被雹隴畝亦止相連一線畛域並非甚寬現據
該縣等稟覆實可無礙收成不惟無須撫卹並借
給籽本亦可毋庸議及核與該道府等會勘情形
無異除飭將正定藁城贊皇三縣應議緩徵村莊

開造頃畝另行照例辦理外臣仍檄飭該府將靈壽等縣勘明被雹甚輕各村暫免應辦襍差仰副聖主軫惠黎元有加無已之至意謹

奏奉

硃批知道了

嘉慶二十一年五月二十七日

奏爲正定等縣二麥被雹村莊應徵本節年糧租恭懇聖恩緩至秋後啟徵以紓民力事竊查正定府屬正定縣於四月十四日被雹汗有傷斃人口之事經臣附片奏

聞一面飛飭正定府率同該縣迅速查勘并委候補道府陶樛賚帶銀兩會同查辦分別撫卹嗣據藁城贊皇靈壽元氏井陘欒城等六縣稟報同日被雹其藁城贊皇二縣亦有傷斃人命復經臣添派清河道韓文綺馳往會同灌勘旋奉

諭旨所傷人口共有幾名應撫卹者卽行撫卹詳悉查明據實覆奏欽此隨據清河道韓文綺等勘明正定縣被雹五十二村莊傷斃人口九十一名藁城縣被雹二十四村莊傷斃人口二十八名贊皇縣被雹七十八村莊傷斃人口二名其靈壽元氏井陘欒城

等四縣被雹較輕并未傷斃人口該道等查明被傷身死之家遵

旨撫卹每戶給銀二兩具稟

臣

覆奏在案茲據藩司錢臻

轉據該道府等勘明正定藁城贊皇三縣被雹村莊二麥歉收三四分不等所有應徵新舊錢糧議請緩徵前來臣查正定藁城贊皇等三縣本年二麥被雹雖勘明僅止歉收三四分例不成灾均可及時補種秋禾而被傷人口之家又蒙

聖慈撫卹固已仰沐

皇仁同聲感頌但補種秋禾不無多糜籽亦民力究未免

卷之二
三
拮据自應量爲調濟以示體卹合無仰懇

皇上格外

天恩俯准將正定藁城贊皇等三縣被雹村莊應徵嘉慶二十一年並節年新舊糧租等項緩至本年秋後徵徵以紓民力其不被雹村莊應徵糧租仍照例徵收至該三縣被雹傷斃人口共一百二十一名除七名並無家屬飭令地方官妥爲斂埋外其餘一百十四口每名賞給銀二兩共需銀二百二十八兩應請在於司庫地糧銀內動支報銷再查靈壽元城井徑樂城等四縣被雹較輕二麥收成並

無妨礙毋庸緩徵謹

奏

嘉慶二十一年五月二十九日奉

上諭那彥成奏正定等縣被雹村莊應徵本年節年糧租懇恩緩徵一摺直隸正定等三縣村莊本年二麥被雹收成歉薄現雖稍種秋禾多糜籽本民力未免拮据著加恩將正定藁城贊皇等三縣被雹村莊應徵二十一年並節年新舊糧租等項緩至本年秋後啟徵以紓民力其被雹傷斃人口卹賞銀兩准其在於司庫地糧內動支報銷該部知道摺併發

嘉慶二十一年六月二十六日

奏爲查明二麥歉收州縣應完舊欠糧租奏懇

聖恩俯准緩徵以紓民力事竊照直隸地方本年春夏以來仰托

聖主洪福雨水調勻爲收年來所未有通省所種二麥普律豐收惟是正定府屬之正定藁城贊皇等三縣間有被雹損傷保定府屬之博野祁州深州武強饒陽安平等六州縣得雨畧少二麥收成稍減先據各該州縣陸續稟報均經分路委員會同本管道府州確查勘報所有正定藁城贊皇等三縣二

麥被雹歉收村莊應徵本節年糧租經_臣先行奏請緩徵仰蒙

恩准在案茲據藩司_踐麟轉據該道府州等勘明博野等六州縣本年二麥被旱歉收分數議請緩徵前來

_臣覆查博野等六州縣本年春夏之際得雨未渥二麥收成利歉既據勘明歉收三四分不等若將該州縣應徵新舊糧租同時並徵民力不無拮据合無仰懇

皇上格外施恩將博野祁州深州武_安饒陽安平等六州縣應完嘉慶十九年以前節欠糧租等項一體緩

至本年秋後啟徵以紓民力則仰荷

鴻慈益無既極矣謹

奏

嘉慶二十一年六月二十八日奉

上諭那彥成奏查明二麥歉收州縣懇請緩徵一摺直隸省本年春夏以來雨澤愆時二麥普報豐收惟博野等州縣一隅缺雨麥收稍歉着加恩將博野邢州深州武強饒陽安平六州縣應完嘉慶十九年以前節欠糧租等項一體緩至本年秋後啟徵以紓民力該部知道

嘉慶二十一年六月二十九日

奏

臣

接據霸昌道齡住稟稱南路同知許嗣容稟報所屬之文安東安等處間有飛蝗停落該廳業已前往督同拊_撫該道隨往查勘旋接許嗣容稟稱文安東安等處因去歲秋汛破堤魚蝦遺種河邊荒澗之地間有蝗孽滋生是以文安縣之界偉三官東安縣之界金官屯等處五六村莊均有飛蝗停落所幸族類未蕃易於撲滅連日又值大雨滂沱業已撲滅淨盡無餘等語臣伏查本年雨暘時若禾苗最為飽茂洵下_溥蒸如使蝗孽滋生爲害匪淺今文安等處所生蝗孽幸未蕃衍雖經

撲滅淨盡第恐再有竊發已一面嚴飭該縣等不
得以現在淨盡稍存大意并飭各屬一體加意
防維毋使萌生爲患謹

奏奉

硃批覽

嘉慶十九年十一月二十三日

奏爲查明上年災歉州縣應徵積欠糧租等項小民力
難新舊並納奏懇

天恩俯准分別帶徵以紓民力事竊查直隸邢臺等四十
五州縣上年麥禾被旱被水被雹開州東明長垣

三州縣被賊滋擾又獲鹿等四十二州縣本年二
麥被旱歉收所有應徵本節年糧租並借欠倉穀
折色口糧等項節經臣奏蒙

恩旨緩至本年秋後啟徵小民感戴

皇仁無不同聲臚頌惟查直屬地方本年秋禾實收通省
僅止七分有餘其中有上年被災較重又有連年
災歉及附近賊匪之區今自秋間開徵以來雖經
督飭各州縣實力催徵無如民間元氣未能驟復
完解新糧已形竭蹶舊欠終實難兼顧臣察看
情形若將本節年糧租等項同時並徵民力實有

未逮茲據藩司錢臻具詳請奏前來合無仰懇

皇上格外

天恩俯准將霸州定興新城完縣邢臺南和平鄉廣宗鉅鹿任縣邯鄲肥鄉曲周廣平雞澤威縣隆平寧晉等十八州縣十八年秋禾被災五六七分地畝蠲剩應分二年帶徵十八年錢糧以及借給本折口糧倉穀等項自二十年起分作四年帶徵成災八九分地畝蠲剩應分三年帶徵十八年錢糧以及借給本折口糧倉穀等項自二十年起分作五年帶徵再該十八州縣上年勘不成災地畝緩徵十

八年以前糧租并借欠倉穀等項同文安東安清
苑唐縣東鹿安州故城青縣靜海滄州鹽山沙河
唐山內邱天平成安磁州元城大名南樂清豐龍
門冀州南宮新河棗強曲陽等二十七州縣上年
勘不成災地畝緩徵十八年以前糧租并借欠倉
穀折色口糧等項自二十年起亦請分作三年帶
徵其十九年糧租自應仍於本年秋後徵收以示
區別如此分限帶徵庶民力益覺寬裕感沐

聖慈更無旣極至開州東明長垣三縣十八年以前錢
糧并借給本折口糧倉穀等項業經奉

恩豁免又獲鹿等四十二州縣內有本年秋禾被雹被霜
被水被蟲村莊應行緩徵者悉照原奉

諭旨辦理其餘僅止二麥被旱應徵新舊糧租開州東明
長垣三州縣應徵十九年新糧等項仍應遵照按
限徵解謹

奏

嘉慶十九年十一月二十五日奉

上諭那彥成奏查明上年災歉州縣應徵積欠糧租等項
懇請分別帶徵一摺據稱直屬地方本年秋成通省僅
止七分有餘其中有連年災歉上年被災較重並被賊

滋擾之區小民完解新糧已形竭蹶若將節年糧租等項同時並徵民力恐有不逮等語所奏自屬實在情形加恩著將霸州定興新城完縣邢臺南和平鄉廣宗鉅鹿任縣邯鄲肥鄉曲周廣平雞澤威縣隆平寧晉等十八州縣十八年秋季被災五六七分地畝蠲剩應分二年帶徵十八年錢糧以及借給本折口糧倉穀等項自二十年起分四年帶徵其成災八九分地畝蠲剩應分三年帶徵十八年錢糧以及借給本折口糧倉穀等項自二十年起分作五年帶徵再該十八州縣上年勘不成災地畝緩徵十八年以前糧租並借給倉穀等項著

與文安東安清苑唐縣東鹿安州故城青縣靜海滄州
鹽山沙河唐山內邱永年成安磁山元城大名南樂清
豐龍門冀州南宮新河棗強曲陽等二十七州縣上年
勘不成災地畝緩徵十八年以前糧租並借欠倉穀折
色口糧等項均自二十年起分作三年帶徵以紓民力
其本年糧租仍於秋後徵收至上年被賊之開州東明
長垣三州縣除十八年以前秋糧並借給本折口糧倉
穀等項前已加恩豁免本年被災之獲鹿等四十二州
縣村莊分別緩徵外其餘僅止二麥被旱應徵新舊糧
租及開州東明長垣三州縣應徵十九年新糧等項俱

仍按限徵收該部知道

嘉慶十九年五月十五日

奏爲各屬續報二麥被旱歉收所有應徵新舊糧租恭摺奏懇

聖恩俯准緩徵以紓民力事竊照直隸邢臺等四十八州縣連年災歉閭閻元氣未復又獲鹿安平二縣上年秋收未能豐稔冬春雨雪稀少所種二麥未能滋長民力拮据經臣奏請將應徵嘉慶十九年暨十八年以前新舊糧租並借欠倉穀等項分別展緩至本年秋後啟徵欽奉

恩旨允准業已敬謹謄黃遍行張貼曉諭小民感戴

皇仁無不同聲歡頌茲據藩司素納覈核詳請緩徵前來

臣查大城等三十四州縣本年二麥被旱歉收與
獲鹿安平二縣情形相似合無奏懇

天恩俯准將大城永清涿州滿城安肅博野望都容城蠡
縣雄縣祁州高陽新安獻縣阜城景州南皮正定
井陘行唐靈壽平山元氏無極贊皇晉州藁城新
樂武邑深州武強饒陽定州深澤等三十四州縣
應完本節年錢糧及旗租倉穀折色口糧銀兩等
項一體緩至本年秋後啟徵以紓民力則小民感

沐

鴻慈益無旣極謹

奏

嘉慶十九年五月十七日奉

上諭那彥成奏陸續二麥歉收州縣懇恩緩徵一摺直隸大名等三十四州縣因冬雪稀少春夏雨澤愆期二麥收成歉薄若將新舊糧租按期納完民力未免拮据著加恩將大城永清涿州滿城安肅博野望都容城蠡縣雄縣祁州高陽新安獻縣阜城景州南皮正定井陘行唐靈壽平山元氏無極贊皇晉州藁城新樂武邑深州

武強饒陽定州深澤等州縣應完本年暨節年錢糧並
旗租倉穀折色口糧銀兩等項一體緩至本年秋後啟
徵以紓民力該部知道摺併發

嘉慶十九年六月十八日

奏續據大興宛平通州固安易州涿水等六州縣稟報
當二麥揚花結穗之時因缺少雨澤收成歉薄由
藩司素納具詳前來臣查核被旱情形與前次

奏准緩徵之獲鹿大城等縣相似所有大興等六州縣
應徵本年節年新舊錢糧租銀並借欠倉穀等項
合無仰懇

皇上天恩俯准一體緩至本年秋後啟徵以紓民力謹
奏

嘉慶十九年六月二十日奉

上諭那彥成奏大興等縣二麥歉收懇恩一體緩徵等語
本年大興等六州縣因缺少雨澤以致二麥收成歉薄
與前次恩准緩徵之獲鹿大城等縣情形相似若將新
舊錢糧照例徵輸民力未免拮据所有大興宛平通州
固安易州涑水六州縣應徵本年節年新舊錢糧租銀
並借欠倉穀等項俱著加恩緩至本年秋後啟徵以紓
民力該部知道

嘉慶十九年八月二十四日

奏查豐潤寶坻龍門定州東安青縣靜海滄州鹽山新
河冀州懷安肥鄉東鹿文安等十五州縣本年秋
禾被水被旱被雹被蟲村莊應徵嘉慶十八年以
前暨應徵十九年錢糧旗租並借欠倉穀等項若
照舊徵收民力未免拮据現屆開徵之期理合奏
懇

天恩俯准緩至嘉慶二十年麥收後啟徵其成熟村莊應
徵糧租等項仍照例徵收以紓民力而示區別據
藩司素納具詳請奏前來理合奏明謹

奏

嘉慶十九年八月二十四日奉

上諭那彥成奏查勘秋禾畧有損傷各州縣情形懇恩緩徵等語直隸豐潤等十五州縣本年秋禾間有被水被旱被雹被蟲之處現屆開徵之期若照例徵收民力未免拮据著加恩將豐潤寶坻龍門定州東安青縣靜海滄州鹽山新河冀州懷安肥鄉東鹿文安十五州縣被災各村莊應徵嘉慶十八年以前暨十九年錢糧旗租並借欠倉穀等項一體緩至二十年麥收後徵收以紓民力其成熟村莊應徵糧租等項仍照例徵收該部知

道

嘉慶十九年十月二十二日

奏爲續報秋禾被水被霜被蟲州縣恭摺奏

聞事竊照豐潤十五州縣本年秋禾其被水被旱被雹被

蟲各村莊前據各該州縣陸續稟報經臣先後具

奏欽奉

諭旨將應徵本年節年糧租並借欠倉穀等項緩至二十
年麥收後啟徵其成熟村莊應徵糧租仍照例徵收欽
此遵卽謄黃遍貼曉諭一面分飭本管道府廳州
委員會同查勘在案嗣又據景州以六七月間大

雨如注低窪地畝一時宣洩不及以致禾苗間被
淹浸又清苑滿城安肅唐縣博野望都完縣祁州
南皮正定新樂易州等十二州縣於本月十四十
五等日驟降嚴霜所種晚禾受傷顆粒未能飽綻
又大城新安等二縣所種禾苗因生粘蟲收成歉
薄各等情先後稟報到臣又經批司委員會同勘
辦茲據具報勘明各該州縣被水被霜被蟲村莊
秋禾各歉收三四分不等并有成災五分之處由
藩司錢臻覆核具詳請奏前來伏查定例歉收三
四分及成災五分應將糧租分別蠲緩并酌借籽

種口糧今原續報本年秋被災歉之豐潤等州縣
秋禾統計尙屬有收其被水被旱被雹被霜被蟲
村莊雖係一隅中之一隅第既歉收成災民力不
無拮据自應照例辦理相應奏懇

天恩俯准將景州清苑滿城安肅唐縣博野望都完縣祁
州南皮正定新樂易州大城新安等十五州縣被
水被霜被蟲各村莊應徵本節年錢糧旗租並借
欠倉穀等項先行照例一體緩至二十年麥收後
啟徵仍遵現奉

諭旨來春青黃不接之時如有應須接濟之處再行據實

具奏再查原續報本年災歉州縣內成熟村庄除成災五分者照例緩徵外其餘成熟地畝應徵新舊糧租等項仍照例徵收又前次具奏懷安縣本年秋禾被雹現據勘報於收成并無妨礙應請別除毋庸辦理謹

奏

嘉慶十九年十月二十四日奉

上諭那彥成奏續報秋禾被水被霜被蟲州縣懇請緩徵一摺直隸景州低窪地畝因夏秋雨大禾苗被淹情形等州縣驟被秋霜晚禾受傷大城等縣田禾因受蟲災

收成歉薄該州縣村莊各款收三四五分不等民力不無拮据著加恩將景州清苑滿城安肅唐縣博野望都完縣祁州南皮正定新樂易州大城新安等十五州縣被水被霜被蟲各村莊應徵本年節年錢糧旗租并借欠倉穀等項一體緩至二十年麥收後啟徵以紓民力其餘成熟地畝應徵旗租仍照例徵收該督前奏被雹之懷安縣今既據勘明於收成并無妨礙著卽扣除該部知道摺并發

嘉慶二十年七月初五日

奏爲查明永定河北岸七工二十四號漫口下游被淹

村莊並瀝水浸淹各村確數仰懇

聖恩分別蠲緩恭摺奏

聞事竊

臣

於二十九日到工查勘即日飭委確查下游被

淹村莊去後旋於工次欽奉

諭旨飭將被淹村莊迅速查明奏請撫卹并蒙

恩旨寬免

臣

及永定河道李于培處分僅罰令

臣

分賠十

分之三跪讀之下

臣

感荷

皇上逾格寬宥

深仁當卽望

闕叩頭惟有愧悚奮興益加勤勉所有籌辦漫口情形

另摺陳

奏外茲據東安縣知縣司馬章代理武清縣典史商誌稟稱該二縣低窪村莊本有瀝水存積又因本年雨水較大是以積澇較往年爲多此次漫口下游查明因渾水經由被淹較重者東安縣境內之小益留屯等十二村武清縣境內之七字堤等十二村僅止渾水濛漫較輕者東安縣之邵家莊等二十三村武清縣之南北雙廟等九村又東安縣之北崔家莊等十五村俱因瀝水淹浸非專由漫口所致各該村民人并無傷損至武清縣瀝水各村

俟查明續報等情嗣經各委員查勘面稟無異
查該處係永定河下口民田廬舍本屬稀少其餘
多係任水蕩漾之區是以東安縣被淹較重者止
有十二村武清縣被淹較重者亦止十二村至該
二縣瀝水各村歷年具奏蒙

聖恩准予蠲緩在案現將被淹較重各村酌量散給儲餅
并發給席片以資搭棚棲止各該處民人感戴
皇仁同聲歡頌察看情形無庸另請撫卹口糧已可不虞
失所所有該二縣漫淹及瀝水各村自應分別診
恤以仰副

聖慈合無籲懇

皇上天恩將東安縣之小益留屯等十二村武清縣之七
字堤等十二村本年應徵錢糧全行蠲免其東安
縣之邵家莊等二十三村武清縣之南北雙廟等
九村應徵本年錢糧請蠲免十分之五至東安縣
之北崔家莊等十五村應徵本年錢糧請緩至來
歲麥收後開徵并飭武清縣將瀝水各村迅速查
明續奏謹

奏

嘉慶二十年七月初六日奉

上諭那彥成奏查明永定河被淹村莊并瀝水淹浸各村懇請分別蠲緩一摺直隸東安武清二縣低窪村莊舊有瀝水積存本年雨水較大積澇尤甚此次漫口下游間有被淹處所茲據該督查明分別輕重奏請撫恤加恩著照所請將被淹較重之東安縣小益留屯等十二村武清縣七字堤等十二村本年應徵錢糧全行蠲免其被淹較輕之東安縣邵家莊等二十三村武清縣南北雙廟等九村應徵本年錢糧蠲免十分之五其因瀝水淹浸之東安縣北崔家莊等十五村應徵本年錢糧緩至明年麥收後啟徵該部知道摺單并發

嘉慶二十年九月二十三日

奏爲查明秋禾被水州縣大概情形恭摺奏懇

聖恩事竊查直隸地方自本年五月內得有透雨大田播種以後晴雨應時通省收成豐稔爲數年來所未有惟因永定河北七工漫口兼有濱臨河淀秋雨稍多之處一時宜洩不及以致武清寶坻薊州霸州保定文安永清東安清苑新城蠡縣雄縣安州高陽新安天津青縣靜海滄州津軍廳元城大名南樂清豐豐潤冀州新河寧晉等二十八州縣廳低窪地畝間被淹浸節據各該州縣廳陸續具報

經臣批司委勘一面先將永定河北七工漫口下游之武清東安二縣被淹村莊應徵本年錢糧奏奉

諭旨分別全蠲半蠲緩徵並於奏報秋禾約收分數摺內聲明秋禾被淹州縣俟委員查勘明確照例辦理在案茲據勘報各該州縣廳秋禾被水村莊多係歉收三四分內惟永清霸州東安武清雄縣安州高陽等七州縣據報成災由藩司錢臻覆核具詳請奏前來臣查武清等二十八州縣廳本年秋季禾被水既有成災之區自應仰體

皇仁照例蠲賑以示體卹第直屬地方以及隣省今歲大勢豐收其被水成災村莊不過一隅中之一隅所有因災乏食貧民目下自可赴隣近豐收州縣備工度日毋庸先行撫卹祇須散放大賑至向來辦賑係按照災分輕重確查極次貧民銀米兼放今歲秋收豐稔糧價平賤若按部價每米一石折給銀一兩四錢可敷災民買食之用况被水州縣存倉米穀爲數無多亦應留爲明春借糶之需臣與藩司錢臻酌議應仰懇

皇上格外天恩將永清霸州東安武清雄縣安州高陽等

七州縣成災村莊應賑乏食貧民照依歷次辦災成案自十一月爲始各按成災分數分別極次按月以每米一石折銀一兩四錢全放折色所需折色銀兩在於司庫地糧銀內動撥給領委員確查據實散放務期實惠及民勿任胥役人等從中扣剋滋弊臣一面委員覆勘如永清等七州縣中有無庸賑濟之處俟查報到日據實剔除總期無遺無濫飭取各該州縣廳已未成災頃畝分數冊結同應行蠲緩賑濟各事宜由司妥議具詳臣覆核

題報謹

奏

嘉慶二十年九月二十四日奉

上諭那彥成奏查明秋禾被水州縣懇恩給賑一摺本年直隸通省秋收豐稔惟因永定河漫口濱臨河淀地方間被淹浸收成歉薄民食不無拮据除武清東安二縣被淹村莊應徵本年錢糧前已降旨分別蠲緩外著加恩將永清霸州東安武清雄縣安州高陽等七州縣成災村莊應賑乏食貧民自十一月爲始各按成災分數分別極次貧戶口按月以每米一石折銀一兩四錢全放折色所需銀兩卽在司庫地糧銀內動撥給領該督

董飭所屬確切勘明認真經理務期實惠及民勿任吏胥侵冒滋弊該部知道摺并發

嘉慶十九年五月二十四日

奏直隸亢旱已久近又暑熱異常保定及省南一帶時

疫頗多醫治竟鮮效驗

臣敬體

聖主好生之德亟欲療救惜外間所用之方均屬無益惟內府辟瘟丹最爲神效本年春間豫省地方民間染患

瘟疫甚多仰蒙

賞頒良方調治悉就痊愈閭閻感戴

皇仁實深歡頌合無仰懇

聖慈將辟瘟丹方

恩賜

頒發俾_臣得以趕緊配合施捨則小民仰沐

再造之恩於靡旣矣謹

奏

嘉慶十九年五月二十六日奉

上諭那彥成奏保定及省南一帶時疫頗多所請辟瘟丹方已飭令抄錄發去該督卽照方配製廣爲散給以拯灾黎

恭錄

欽頒清瘟解毒丸

牛蒡子 二兩

馬勃 二兩

薄荷 五錢

連翹 二兩

黃連 一兩

元參 二兩

板藍根 二兩

黃芩 一兩

僵蠶 一兩

柴胡 一兩

甘草 五錢

共研細末蜜丸重三錢每服一丸開水送下此方
治天下瘟疫時毒

欽頒藿香正氣丸

藿香 二兩

陳皮 一兩

枳殼 一兩

蘇梗 一兩

大腹皮 一兩

桔梗 一兩

蒼朮 一兩

白芷 一兩

赤茯苓 二兩

厚樸 一兩

半夏曲 一兩

甘草 一兩

共研細末蜜丸重三錢每服一丸白開水送下治
四時一切不正之氣

嘉慶十九年六月十八日

奏臣竊思民爲邦本食爲民天

皇上軫念窮黎每遇地方偶有災傷不惜千萬帑金隨
時拯濟今年直隸麥收歉薄雨澤稍愆卽蒙

垂厯秋成豫爲籌計仰見

宵旰憂勤

心殷保赤是以感迓

天和兩旬以來甘霖優沾頗有轉歉爲豐氣象臣欽感之

餘實深欣幸惟直隸本係積累之區溯查乾隆五十九年欽奉

恩旨豁免節年民欠地糧等銀二百餘萬兩出借倉糧等項一百餘萬石逮乾隆六十年又蒙

恩旨豁免災緩民欠地糧等銀七十餘萬兩出借倉糧等項二十餘萬石小民疊荷

鴻施最爲優渥比年以來連遭歉歲去秋又值兵差體察民情元氣難以驟復而災歉州縣民欠錢糧積漸增多迄無完納之實徒有追呼之擾而錢糧終歸烏有查直省自去年邪匪勦淨以來人心甫經安

定此時正當仰懇

天恩及時沛澤莠民既痛加懲創良民更普沐

仁膏則

威德兼敷億兆益知感畏但民欠固宜拯卹而

國計亦當周計今查得自嘉慶二年至十八年積款及
大兵經由各州縣民欠地糧及借給折色銀兩共
三百四十餘萬兩米糧穀豆等項共一十四萬餘
石草六萬餘束爲數過多臣愚昧之見未可遽議
全行蠲免或分別輕重十分之三四五分的量乞
恩又未敢冒昧率行陳奏謹先請

聖訓倘蒙

允可并請

明降諭旨令臣查奏以杜市恩之習若未盡協當臣亦不

敢瀆請謹

奏

嘉慶十九年六月二十日軍機大臣字寄奉

上諭那彥成奏直隸省自嘉慶二年至十八年積欠及大
兵經由各州縣民欠地糧併借給折色銀兩共銀三百
四十餘萬兩米糧穀豆等項共一十四萬餘石草六萬
餘束爲數過多請分別蠲免十分之三四五分等語直

殊所奏乖謬之極

隸省前次辦理清查之後業已嚴降諭旨各州縣不准
絲毫再有續虧嗣後亦不得更借清查名目以爲掩飾
虧空地步那彥成到直未久復爲此奏自係該省屬員
欲將虧空混入民欠之內創爲此議覬覦邀免那彥成
受其慫恿率行入奏著傳旨嚴行申飭

殊

大膽目昧總不惟再提此事

嘉慶二十年十二月二十一日

奏爲請

旨勅下奉天省照常開糶以裨商運而資民食據稟具奏
仰懇

聖恩事竊據天津道張五緯稟據海運糧商船戶陳和敬

等粟稱伊等商船派運軍需豆石歷有成規自廣
開海運以來海濱商民排造船隻販運貿遷因有
餘利船始日增不獨內省民食有裨卽奉省之軍
需豆石亦借商船載運是以乾隆三十一年奉省
奏請停運欽奉

上諭毋庸禁止數十年來遵照販運商船往返得資餘利
船隻既可時修差運亦能踴躍每逢裝運奉省官
豆之時蒙

賞發水脚之外衆船公議幫貼付與裝差之船彼此兩有
裨益今奉省出示禁糴停運日久本年奉省收成

並未歉薄仍未聞有開糶之信海濱居民附近天津寧河等州縣以船爲生以商代稼商船停泊水手失業船隻日見拆毀存者亦多罅漏不特辦公無資亦且謀生無路轉瞬冰泮卽須派運官豆理合稟懇咨明奉省開糶等情稟請核

奏前來

臣

伏查本年海運稀少春夏以前固有奉省禁

糶入秋以來實因內省各屬年豐糧賤商販難資餘利是以不禁自減前據該道稟懇業經咨詢奉省在案今復據情具稟核查此項商船從前原有六百餘隻近年祇存二百四十餘隻海運本賴商

通官豆更年需裝載所有運豆水脚不敷向係販
運各船出資幫貼以盈補絀集私濟公洵屬均有
裨益且海濱居民童叟水手者不下萬餘人駕駛
而外別無他能又有數百剝船數千挑脚人夫亦
專靠起載營生若停運日久商船不能流通此等
全資駛運爲生別無營運之萬數千人轉致不能
謀食嗷嗷束手亦有未便况年例運豆萬難遲悞
瞬屆春融卽須派運至此項無業貧民饑寒交迫
人數衆多實堪憫惻臣現飭天津道府趕緊籌款
辦理粥廠數處俾資餬口不致流亡惟今歲如此

來年亦須籌及是奉省禁糶一事終不可長久相
應

奏明請

旨勅下

盛京將軍奉天府尹查明該省收成可以照常通商販
運卽奏咨開糶庶商販既可流通民食亦藉充足
謹

奏

容安謹按此奏上奉

旨交

盛京將軍晉公昌查辦

那文毅公初任直隸總督奏議

卷四十四

哭

調劑鼓鑄

嘉慶二十年二月十八日

奏爲寶直局爐頭匠役人等額支工料錢文不敷辦公

額懇

聖恩賞借工料以資鼓鑄事據管理寶直局監督事保定府同知汪河詳稱據爐頭李鳳鳴等呈稱直隸寶直局鼓鑄錢文爐頭匠役人等每年額支工食錢五千六百三十四串二百四十文料價銀合錢四千五百五十七串一百二十文向在藩庫按月支領以資食用并採買料物之需從前原可敷衍近

年以來百物昂貴而工料不能增多爐頭匠役人等辦理鼓鑄遂形拮据查嘉慶十八年間京城寶泉局因物價昂貴爐頭等辦公竭廳請借二年半工料錢十七萬五千零分作二十五年扣還奏蒙恩准在案今寶直局事同一例籲請懇奏

賞借兩年工食料價錢文俾得生息添補所借之項在額支工料錢內分作十二年扣還歸欸等情由布政使錢臻核明具詳請

奏前來

臣

覆查近來諸物昂貴該局額支工料不敷辦

公尙屬實在情形查該局每月應領工食銀四百

六十九串五百二十文料價銀三百七十九兩七錢六分今請借兩年工食計需錢一萬一千二百六十八串四百八十文又兩年料價按每兩合制錢一串折給計需錢九千一百一十四串二百四十文二共需錢二萬三百八十二串七百二十文該局所鑄錢文飭據查覆現存錢八萬二千七百七十串零合無仰懇

聖恩俯賜援照京局借支工料之案准其借給以資辦公所借錢文分作十二年在於司庫每月請領額支工料錢文內均勻扣還歸款如蒙

恩允請借前項錢文卽飭令藩司照數在於該局鑄存錢

文內動撥謹

奏

嘉慶二十年二月二十日奉

上諭那彥成奏寶直局請借支工料以資鼓鑄一摺寶直局額支工料價值向在藩庫按月支領近因物值昂貴辦公拮据該督所請自係實在情形加恩著照所請准其於該局鑄存錢文內借給兩年工食料價錢二萬三百八十二串零俾得生息濟用所借錢文分作十二年在於司庫每月額支工料錢文內均勻扣還歸款

懇准商場出租

嘉慶二十年二月十三日

奏爲遵

旨查明長蘆灘副情形實應出租勘曬以紓窳力酌定章

程恭摺覆奏事竊臣接准戶部咨開議覆長蘆鹽

政奏請將豐財蘆臺兩場灘副租給商民勘曬一

摺欽奉

諭旨各場窳地向禁商民租典該鹽政奏請仍許出租以
紓窳力是否實於窳戶有益并將來有無滋弊之處著
交那彥成查明實在情形覆奏再行核辦欽此臣遵卽

遊委候補道李于培署河間府事候補道程卓樑
前往確查去後茲據查明豐財蘆臺兩場灘副因
竈戶無力停曬間有荒廢似應准其出租勘曬等
情稟請具

奏前來

臣

伏查衆竈以曬鹽爲生灘副乃其命產一經

典賣無以爲業是以嘉慶九年間經前督臣顏檢
於辦理豐財場竈戶寇闖團等呈控商人宋思德
等批買灘鹽抑勒減價案內查出商民租典竈灘
酌議量減原價回贖以安竈業倘復行私租私典
別經發覺卽將灘副契價一并撤出入官仍各治

以應得之罪等因奏准部覆飭遵在案洵屬體卹
竈戶不使失業之意但灘副係海濱斥鹵必須挑
濠打埕引水曬晾產鹽始旺若乏工本興修濠埕
則灘副荒蕪便爲棄地奏禁以後在有力竈戶固
可自行經理無力竈戶不能自曬又不敢典賣遂
致坐視失業若不便通調劑不特灘副拋荒產鹽
日形短絀於商運大有關係且竈戶貧乏無力經
營情亦可憫竊思竈戶典賣灘副固干例禁若因
自乏工本出租勘曬亦屬權宜之道蓋竈戶將灘
副出典之後仍係業主將來力量寬裕仍可收回

自曬而商民出本圖利興修已廢灘副產鹽興旺
於

國課民食亦有裨益所有長蘆鹽政奏請將灘副租給
商民之處似屬可行第不明定章程恐致日久滋
弊臣愚昧之見豐財蘆臺兩場無力窺戶灘副應
請准其租給商民勘曬或與商民夥曬所產鹽助
責成場員實力稽查按引配運倘有影射典賣及
將鹽劬私自出售情事一經察出照例究辦至窺
戶出租後商民修理灘副已費工本刁玩窺戶見
灘已修復增租奪佃或豪強商民勒捐業主不令

收回均未可定亦應定以年限以杜爭訟臣酌議
凡停曬未久修灘工本較少者定限五年准其另
租其停曬日久修灘工本較多者定限八年准其
另租其竈戶收回自曬亦照此限制則業主租戶
兩得其平訟端無自而起如此明定章程既與竈
戶有益亦可不致滋弊謹

奏奉

硃批戶部議奏

請借運本

嘉慶二十年八月二十三日

奏爲遵

旨查明覆奏事竊據長蘆鹽政廣惠奏蘆商王瑛以資本
週轉不及懇借運本銀三萬兩一摺欽奉

諭旨著那彥成到津察看該商辦運情形其懇借運本銀
兩應否借給如事屬可行俟奏到日再行賞借若違例
妄請卽行叅奏議駁廣惠摺發給閱看欽此

臣

查閱廣

惠原摺僅據聲稱照例請借並未叙明何例何案
又稱借領後分作六年歸款並無加息字樣且王

瑛祖遺引產業已交官其現在辦運情形是否不致貽誤又造船經費一項係屬何款均未切實聲叙當卽咨行該鹽政據實查覆旋據各稱鹽法誌載雍正年間題留鹽課銀五萬兩作爲鹽本接濟貧乏商窳嗣又於蘆商公捐項下留銀三萬七千餘兩收貯運庫照接濟商窳之例以各商公捐之項仍備商窳不時之需經大學士會同戶部議准歷久遵行嗣後遇有新商接辦官引及商人辦運拮据奏明動款借給運本倘銀數較多如通綱所借六十萬八十萬兩加一倍利分年帶完倘銀數

較少如義和泰接辦薊州遵化等處引地借給庫
項四萬兩又通綱分領淮本白數百兩至萬餘兩
不等俱免其加息歷來辦有成案今王瑛請借運
本三萬兩因其自置引庫俱已呈交歸公隨同衆
商完交官租其應交欸項繁重若令加息核其引
地所得餘利不敷完納是以照案辦理至王瑛辦
運情形僅按三年比較於十八年分共運鹽三萬
一千三百九十九包十九年分共運鹽二萬一千
一百七十七包二十年分共運鹽一萬九千九百
八十七包現在求借運本趕辦引鹽係爲來春銷

數若開春再爲辦運必致貽悞至造船經費各商
接引捐銀四分四釐有奇至嘉慶十一年排造後
應俟下屆排造再行解部現在無須動用是以請
於此項內借給並據檢齊卷案咨送前來臣覆核
無異惟查原摺內據商人義和泰李永盛等十商
情愿出結具保復據綱總商人李偉查稟等情是
否屬實傳訊該十商等僉稱本商如不能歸還情
甘分限分賠不歸叅課彌補綱總李偉亦供稱該
商得此接濟自可源源週轉不致再有貽累各等
語臣覆查廣惠奏請借給王瑛運本銀三萬兩係

因該商承辦官引酌量調劑核明例案均屬相符
免其出息亦係照案辦理該商辦運情形實形拮
据若不及時接濟勢必悞運叅革不特該商欠欸
繁重貽累通綱且係官引必須另招新商轉需多
借運本不若接濟現商較爲事半功倍臣逐層細
核體察情勢似尙屬可行相應據情

奏明可否俯如該鹽政所奏准於造船經費欸下

賞借該商人王瑛運本銀三萬兩俾資接濟之處出自

皇上格外天恩惟原摺內稱俟二十一年奏銷後起分作

六年歸欸

臣

查此項運本既經照案免其出息未

便緩至六年分還應請於二十一年奏銷後起分
作四年歸款庶官引益藉充裕庫項亦得早完謹
奏

嘉慶二十年八月二十九日奉

上諭那彥成奏查明蘆商請借運本一摺前據廣惠奏請
借給蘆商王瑛運本三萬兩交那彥成查核茲據查明
該商辦運情形現在實形拮据廣惠酌量調劑核與例
案均屬相符加恩著照所請准其於造船經費項下賞
借該商王瑛運本銀三萬兩俾資接濟此項運本既照
案免其出息未便緩至六年歸款著於嘉慶二十一年

奏銷後起限分作四年歸還庫欵該部知道

恭報雨雪

嘉慶十九年閏二月初三日

奏爲據報各屬得雪仰慰

聖懷事竊保定省城於二月二十八九等日得雪三寸有

餘業經臣於二十九日附片奏

聞在案三十日承准軍機大臣字寄奉

上諭京師自本月二十七日陰雲漸布至二十八日醞釀
濃厚已午以後雨雪間作飄灑及夜遂成大雪至本日
寅刻方止計已五寸有餘實爲優渥兩日來同雲遠覆
沾被自廣畿南一路大順廣等屬前據報有透雪其正

定保定河間天津各屬此次雪澤是否均霑著那彥成查明由驛具奏以慰雇注欽此臣跪誦之下仰見

聖澤

覃敷

天心協應際此春分節候

京畿滹沱甘膏下忱寶深欣慶茲據順天府屬之通州
文安大城良鄉涿州房山昌平保定府屬之安肅
滿城安州新城定興雄縣容城望都高陽祁州博
野新安蠡縣完縣唐縣正定府屬之正定新樂阜
平河間府屬之河間任邱肅寧易州並所屬之涿

水深州並所屬之安平饒陽定州並所屬之曲陽
深澤等州縣稟報二月二十八九等日各得雪一
二三四寸不等麥苗得此滋培民情甚爲歡悅其
餘各府州屬現尙未據報到理合遵

旨由驛具奏仰慰

聖懷謹

奏奉

硃批欣慰覽之

嘉慶十九年閏二月初十日

奏保定省城並通州等處於二月二十八九等日得有

雪澤經臣先後具

奏在案茲又據順天府屬之香河武清三河固安永清
保定霸州平谷順義密雲懷柔昌平永平府屬之
臨榆樂亭宣化府屬之宣化赤城萬全龍門蔚州
懷來西寧懷安延慶保安河間府屬之交河正定
府屬之欒城行唐靈壽平山晉州無極藁城廣平
府屬之成安礮州大名府屬之開州承德府併所
屬朝陽豐寧赤峯通永道屬之遵化州易州屬之
廣昌冀州屬之武邑衡水等州縣各據具報於二
月二十八九等日得雪自一寸至五寸不等又廣

平府屬之威縣大名府屬之開州東明長垣宣化
府屬之蔚州永平府屬之盧龍臨榆承德府併所
屬之豐寧建昌平泉口北道屬之張家口廳獨石
口廳易州屬之廣昌等各州縣先據具報於二月
初七八並十四五及二十五日得雪自一寸至六
寸不等當麥苗長發之時得此雪澤普霑洵爲有
益足以仰慰

聖懷謹

奏奉

硃批欣慰覽之

嘉慶十九年閏二月二十日

奏臣

據各屬報於閏二月初九日宣化府懷來懷安二縣各得雨一寸保定府束鹿縣得雨一寸河間府河間獻縣吳橋景州東光阜城寧津交河故城等州縣得雨一二寸不等天津府滄州南皮慶雲鹽山等州縣得雨一二寸正定府欒城縣得雨一寸順德府邢臺沙河南和唐山內邱任縣鉅鹿平鄉廣宗等縣得雨一二三寸不等廣平府永年邯鄲成安磁州清河肥鄉曲周威縣雞澤廣平等州縣得雨二三四寸不等大名府元城大名南樂等縣

得雨一二三寸不等冀州併所屬棗強南宮新河
武邑衡水等縣得雨一二三寸不等趙州併所屬
柏鄉隆平臨城等縣得雨一二寸不等深州併所
屬武強縣得雨一二寸不等陸續具報前來當此
東作方興之際得此時雨滋培麥苗益滋暢發農
民甚爲歡慶洵足仰慰

聖懷謹

奏奉

硃批欣慰覽之

嘉慶十九年三月二十二日

奏爲恭報省城得雨情形事竊照保定省城於閏二月
二十三日得雨二寸之後今將及一月土脈又形
乾旱而省南正定府一帶久未得雨尤殷盼望臣
於十九日率同司道虔誠祈禱卽於是日申時起
小雨霏霖不疾不徐滴滴入土至戌時止得雨二
寸並據各屬申報於三月十四等日順天府良鄉
寶坻薊州武清三河平谷香河得雨一二三寸不
等宣化府蔚州得雨二寸永平府灤州得雨一寸
遷安縣得雨三寸河間府吳橋東光故城寧津景
州等州縣得雨一二寸不等天津府天津靜海滄

州等州縣得雨一二寸遵化州併豐潤縣得雨二寸易州廣昌縣得雨一寸各等情前來臣仍率屬虔祈俟得有甘霖再行奏報謹

奏奉

硃批京中得雨二寸不爲深透通省被澤速具奏聞惟務實不可虛假

嘉慶十九年四月初七日

奏爲保定正定河間三府定州深州趙州冀州等四直隸州上冬雪澤稀少本年春夏以來雖節次得雨亦未霑足連日風狂日烈頗形亢旱臣現在率同

司道等官虔誠步禱並飭屬一體虔祈如半月之內得有透雨仍可補種大田倘逾期未得雨澤自當查明實在情形奏懇

聖恩照例辦理臣身任地方斷不敢稍存諱飾謹
奏奉

硃批得雨卽奏

嘉慶十九年四月初十日

奏爲恭報省城得雨情形事竊照保定省城於三月十九日得雨二寸本未霑足旬餘以來風狂日烈土脈又形乾旱農民盼澤甚殷茲於四月初九日申

時起至戌時止得雨三寸不特麥苗藉資長發卽
大田亦可翻犁補植農民甚爲歡欣現在沉陰未
歛雨勢尙濃已飛查各屬是否一律均霑俟陸續
報到另行具奏謹

奏奉

硃批知道了

嘉慶十九年四月十五日

奏三月二十四五并四月初九初十等日順德府邢臺
沙河內邱唐山等縣得雨一二寸不等廣平府永
年磁州邯鄲成安廣平威縣等州縣得雨一二寸

那文毅公初任直隸總督奏議

卷四十四

七

不等大名府東明縣得雨二寸大名元城清豐等縣得雨一二寸不等承德府建昌平泉朝陽等州縣得雨二三寸不等口北道屬張家口廳得雨二寸順天府固安東安保定三河香河薊州霸州通州等州縣得雨一二寸不等保定府安州安肅定興滿城雄縣高陽束鹿祁州新安蠡縣容城博野新城等州縣得雨一二三寸不等河間府河間肅寧任邱交河獻縣等縣得雨一二寸不等天津府滄州得雨一寸正定府藁城新樂無極元氏晉州灤城等州縣得雨一二三寸不等宣化府宣化萬

全延慶等州縣得雨一二寸不等通永道屬遵化
州得雨二寸趙州併所屬隆平臨城柏鄉高邑寧
晉等縣得雨二三寸不等先後申報前來理合奏

聞謹

奏奉

硃批覽

嘉慶十九年五月十八日

奏保定正定河間三府定州深州趙州冀州四直隸州

前因缺少雨澤地方頗形亢旱經臣附片奏

聞欽奉

硃批得雨卽奏欽此臣近兩月以來節次率屬虔誠步禱

該府州等雖均得雨數次但止一二三寸地脈乾

旱已久不過稍爲滋潤二麥除低窪地畝尙有薄

收其餘均已枯槁業經失望連日雨勢時作俱被

大風吹散實切焦灼之至臣訪詢鄉間農民據稱

十日之內得有透雨尙可趕種晚秋等語臣現仍

設壇敬謹祈禱旬日之內竟未得雨則地方災

歉已成應如何調濟賑卹之處自當委員查明實

在情形率同所屬悉心酌核奏懇

聖恩斷不敢稍存諱飾仰副

皇上厯念民依之至意日內倘得仰賴

聖主福庇得有透雨再將如何辦理之處恭摺奏

聞仰慰

聖懷謹

奏奉

硃批似汝又因循又糊塗之總督

上天必不降澤極力懺悔改過庶幾有救

嘉慶十九年五月二十六日

奏爲恭報省城得雨情形事竊照保定省城四月二十

七日得雨之後至今將及一月未得雨澤頗形乾

旱臣率屬祈禱將及一月官民盼望甚殷茲於本月二十五日酉時起至戌時止得雨三寸詢知鄉民低窪地畝已可耕犁刻下節過小暑不能補種大田而晚禾襍糧尙可補種再得雨水接濟晚秋尙有可望並據摺差回省稟稱良鄉涿州已得透雨是日東南一帶雨勢濃厚諒可同被甘澍現已飛劄行查俟報到日彙奏至各屬內如有未經得雨成災之處容俟確查再行奏

聞謹

奏奉

硃批續沛速奏

嘉慶十九年五月二十六日

奏現據各屬報五月十九二十等日順天府通州涿州
良鄉懷柔順義昌平密雲等七州縣得雨一二三
寸保定府定興唐縣滿城等三縣得雨一二寸永
平府撫寧臨榆等二縣於五月十五日得雨三四
寸宣化府萬全宣化保安延慶赤城懷安懷來蔚
州龍門等九州縣得雨一二三寸天津府鹽山縣
得雨二寸承德府赤峯豐寧等二縣得雨三四寸
易州併所屬涑水廣昌等二縣得雨一二三寸定

州曲陽縣得雨一寸各等情前來謹

奏奉

硃批祝現等逆賊總不就獲汝每次奏摺一字不提是何居心據實回奏

嘉慶十九年六月初一日

奏爲省城及順天等府屬續得甘澍並南運河水勢增長糧船經行可期順利情形恭摺具奏仰祈

聖鑒事竊照保定省城於五月二十五日得雨三寸嗣據各屬申報五月十一二三等日順天等府大城等州縣得有雨澤經臣先後奏報在案茲保定省城

復於五月二十七日未時起至戌時止續得雨三寸又據申報五月二十四二十六等日順天府薊州平谷永清固安等州縣得雨一二寸及四寸不等保定府祁州得雨四寸永平府昌黎遷安灤州撫寧盧龍等州縣得雨三四五寸河間府河間肅寧交河獻縣任邱等縣得雨二三四寸正定府井陘縣得雨二寸廣平府廣平縣得雨三寸大名府開州清豐東明等州縣得雨三五寸南樂縣得雨五寸以上各州縣前後接連均已深透遵化州併所屬玉田縣得雨二寸趙州併所屬柏鄉縣得雨

一二寸深州安平縣得雨一寸定州深澤縣得雨
一寸並據天津道李鑾宣稟稱該道暫駐滄州磚
河催趲糧船五月二十五日卯刻南運河長水一
寸午刻長水三寸是夜亥刻雷電交作大雨如注
子刻以後雨勢稍緩直至二十六日辰刻止得雨
五寸南運河水勢又長四寸測量古淺處所水深
二尺八九寸糧船經行已可無虞阻滯等情稟報
前來臣伏查直隸地方頻年災歉戶鮮蓋藏若非
歲獲有收民食頗難接濟而漕糧爲

國家惟正之供官俸兵糈關係更重必得早達

天庾方可期其無悞前因直省雨澤缺少大田不能補種

兼之南運河水甚短細糧船行走甚艱

臣職司守

土目擊情形實屬萬分焦灼茲幸省城甘雨優沾各屬大半深透詢問鄉農僉稱可以補種晚禾連日沉陰甚廣諒可普被甘霖此後再得雨水接濟收成卽可有望南運河現在長水九寸糧船足資浮送以後各幫軍船自可銜尾北上早抵通壩此皆仰賴

聖主洪福故能甘膏疊被晚秋可種河水充盈通省官民無不歡欣慶幸理合具奏仰慰

聖懷謹

奏奉

硃批京師一帶自二十九日至初三日得雨深透現尙未
霽

天恩優渥欽感無涯汝職司守土須常存敬勤不可怠玩
慎之

嘉慶十九年六月初一日

奏正在繕摺間據各屬具報五月二十五六等日順天
府大城霸州等州縣得雨二寸保定府束鹿容城
唐縣安肅望都高陽雄縣安州蠡縣新安等州縣

得雨一二三四五寸永平府樂亭縣得雨三寸撫
寧得雨三寸河間府景州吳橋東光肅寧故城寧
津任邱等州縣得雨一二三四寸天津府南皮青
縣得雨二三寸正定府靈壽元氏欒城贊皇阜平
藁城新樂無極獲鹿等縣得雨一二三四五寸正
定縣得雨深透順德府任邱平鄉廣宗內邱邢臺
鉅鹿唐山沙河等縣得雨一二三四寸廣平府曲
周廣平成安威縣永年磁州清河等州縣得雨一
二三四寸大名府長垣大名元城開州東明等州
縣得雨二寸四寸不等宣化府宣化縣得雨二寸

翼州得雨一寸所屬棗強縣得雨三寸趙州臨城
寧晉縣得雨一寸隆平縣得雨四寸定州得雨三
寸所屬曲陽縣得雨二寸張家口廳得雨二寸各
等情前來理合謹

奏奉

硃批覽

嘉慶十九年六月初三日

奏爲各屬得雨情形恭摺奏

聞事竊照保定省城於五月二十七日續得雨澤並各州
縣得雨日期分寸已於六月初一日具

奏在案嗣據各屬具報五月二十七八九等日順天府
保定文安大城永清霸州武清薊州寶坻東安良
鄉涿州房山固安等十三州縣得雨一二三四寸
至深透不等保定府新城東鹿祁州定興容城滿
城完縣唐縣等州縣得雨二三四寸至深透不等
永平府灤州得雨三寸河間府阜城獻縣景州吳
橋寧津東光交河故城等州縣得雨二三四五寸
至深透不等天津府天津青縣靜海慶雲鹽山等
五縣得雨二三四寸至深透不等正定府贊皇元
氏井陘藁城晉州行唐靈壽欒城阜平等州縣得

雨二三四五寸至深透不等順德府邢臺南和任
縣唐山內邱沙河等縣得雨三五寸至深透不等
廣平府曲周雞澤邯鄲清河成安等縣得雨二三
四寸不等大名府元城大名長垣等三縣得雨二
三寸不等宣化府萬全縣得雨二寸承德府平泉
朝陽豐寧等州縣得雨三四五寸不等遵化州玉
田縣得雨三寸易州併所屬涑水縣得雨四寸冀
州併所屬南宮新河武邑棗強衡水等州縣得雨
二三四寸不等趙州併所屬寧晉柏鄉隆平臨城
高邑等六州縣得雨三四五六寸不等深州併所

屬饒陽安平武強等四州縣得雨二三四寸不等
定州併所屬深澤曲陽等州縣得雨二寸至深透
不等各稟報前來直隸地方連次渥澤頻沾且深
透之處居多官民望歲之情同深歡慶理合奏

聞謹

奏奉

硃批欣慰覽之

嘉慶二十年三月二十三日

奏據各屬申報三月十一二等日順天府屬寶坻霸州
昌平保定密雲宣河武清香河懷柔固安等州縣

得雨一二三寸保定府滿城完縣望都唐縣祁州
雄縣蠡縣安肅安州容城等州縣得雨一二三寸
永平府樂亭縣得雨二寸河間府河間景州寧津
東光故城阜城交河任邱肅寧獻縣吳橋等州縣
得雨一二三寸天津府南皮靜海青縣滄州等州
縣得雨一二三寸正定府正定新樂欒城行唐阜
平靈壽藁城無極晉州井陘獲鹿等州縣得雨一
二三寸順德府邢臺唐山內邱任縣沙河鉅鹿廣
宗平鄉南和等縣得雨一二三寸廣平府永年廣
平威縣成安肥鄉雞澤曲周清河邯鄲等縣得雨

一二寸宣化府宣化西寧萬全蔚州赤城龍門懷
安延慶等州縣得雨一二三寸承德府併所屬豐
寧灤平平泉等州縣得雨二三四寸至深透不等
易州併所屬廣昌縣得雨二寸冀州衡水棗強新
河武邑等縣得雨一二寸趙州併所屬高邑寧晉
隆平臨城等縣得雨一二寸深州併所屬武強安
平饒陽等縣各得雨一寸定州曲陽縣得雨二寸
口北道屬張家口獨石口多倫等三廳得雨一二
三寸查十一二等日正當

皇上謁

陵禮成駐

躡盤山之時寶坻縣等九十六州縣廳甘霖普沐咸樂

涵濡所有通省黎元莫不欽欣抃躍共慶隨

懋之澤豐收可卜今據先後申報前來理合奏

聞謹

奏奉

硃批二十三日夜又得雨二寸

海子四日實屬吉祥從汝之請豈非笑柄

嘉慶二十年四月二十三日

奏保定省城於四月二十二日又得雨五寸又據霸州

保定房山涿州容城雄縣新城安肅滿城望都唐
縣完縣蠡縣博野祁州新安安州高陽定興河間
交河阜城晉州邢臺邯鄲易州涇水武邑趙州高
邑寧晉饒陽安平泉州曲陽深澤等四十三州縣
具報於四月二十二三日得雨一二三寸并深透
不等武清固安永清盧龍遷安撫寧遵化等七州
縣於四月十九日并二十日得雨一二三寸并深
透不等吳橋故城南皮平鄉廣宗鉅鹿清河威縣
曲周大名元城南樂清豐蔚州豐寧廣昌南宮新
河隆平等十九州縣於四月十四五日得雨一二

三寸至五寸不等各等情先後申報前來謹

奏奉

硃批二十三日得雨四寸二十二日得雨二寸特諭汝知

同感

吳貺

嘉慶二十年五月初六日

奏查保定省城於五月初四日得雨深透又據通州三
河武清薊州霸州保定文安大城固安永清東安
良鄉房山涿州昌平順義平谷滿城高陽望都安
肅定興雄縣新城新安蠡縣容城唐縣博野完縣

祁州安州東鹿河間肅寧任邱獻縣景州交河阜
城天津青縣靜海正定元氏贊皇獲鹿新樂阜平
行唐藁城無極欒城晉州靈壽平山井陘邢臺南
和唐山沙河延慶易州武邑趙州寧晉隆平高邑
柏鄉臨城深州安平饒陽武強定州曲陽深澤等
七十七州縣具報於五月初四日得雨一二三寸
至深透不等寶坻香河寧河懷柔密雲遷安臨榆
樂亭灤州東光南皮滄州平鄉威縣雞澤清河宣
化蔚州懷安赤城懷來豐寧平泉赤峯建昌遵化
豐潤玉田冀州棗強衡水南宮獨石口廳等三十

三州縣廳於四月二十二三日得雨一二三寸至
深透不等承德府於四月二十日得雨四寸昌黎
縣於四月二十日得雨二寸各等情先後申報前
來理合謹

奏奉

硃批京師於五月初三日亥時下大雨直至初四日未時
深透之至初八九日又得小雨幾次

嘉慶二十年五月十四日

奏爲恭報省城得雨深透事竊照保定省城春雨本少
入夏以後僅於四月初八日得雨一寸月餘以來

頗形乾旱節經臣率同司道等官虔誠步禱雖外
府州縣時有報雨而省城總未得雨節逾芒種實
深盼望茲仰托

聖主鴻福省城於本月十一日酉戌之間雷聲大作得雨
一陣天未放晴復於是日戌時起至十二日申時
止大雨滂沱入土深透已種之早禾藉以滋培長
發未種之地均可趕種晚穀裸糧凡在官民無不
同深懽慶是日陰雲甚廣得雨之處必多現在飛
劄飭查俟報到再行彙奏理合具奏仰慰

聖懷謹

奏奉

硃批欣慰覽之

嘉慶二十年五月十四日

奏臣正在繕摺間欽奉

上諭御史吳賡枚奏直隸界內天氣亢旱望澤甚殷等語
京城旬日以來又覺缺雨朕因

方澤大祀屆期擬於祀日虔祈倘逾七日甘霖未沛再擬
分壇籲禱本日卯初膏雨應時至巳刻雨勢更覺滂沛
現尙未止仰瞻雲氣甚覺濃厚寬廣不知畿南一帶能
否一律普霑直隸界內上年冬雪未足土脈乾燥如日

內未得透雨大田望澤孔殷著那彥成卽率同各地方
官虔誠祈禱以冀速敷閩澤一經得有透雨迅速具奏
以慰厯注欽此仰見

聖主厯念民依無時或釋臣跪讀之下欽佩難名除省城

得雨深透情形現已另摺具奏外茲又據各屬申
報五月十三日保定府安州安肅定興望都完縣
滿城等六州縣得雨三寸五六七寸至深透不等
當雲霓之望切得膏雨之優霑是皆仰蒙

皇上虔誠默禱感格

天心所致合省官民實深欽頌謹

奏奉

硃批覽

嘉慶二十年五月十七日

奏五月十一二三等日省城并安州等四十八州縣具

報得雨業經臣具奏仰邀

聖鑒茲順天府等屬通州等八十二州縣於五月十二三
等日得雨自一二三四五六寸至深透不等陸續
具報前來伏查本年直隸地方春夏以來雨澤稀
少臣與通省官民同殷盼望仰蒙

聖主民依念切

默禱

虔祈於三日之內一百三十州縣均霑渥澤兼多深透凡
此甘霖之速沛實由

誠敬之感孚臣實深欽感欽佩謹

奏奉

硃批

方澤祭後竟夜大雨又蒙

賜佑我君臣同深感戴益當勤敬不可志得自滿

嘉慶二十年十月十八日

奏爲恭報得雪情形事竊臣查直隸本年夏秋以來雨

澤勻調秋收豐稔農民俱已乘時廣種麥口現屆
冬令盼雪維殷茲據保定河間正定順德定州深
州趙州所屬各州縣先後稟報於十月十四五等
日各得雪一寸至四寸不等查麥苗正當播種之
後祥霽早沛沃澤優沾土膏益資培厚來牟預兆
閭里騰懽洵堪仰慰

聖懷謹

奏奉

硃批欣慰覽之

容安謹按嘉慶二十年十二月二十三日循例

奏報糧價一摺奉

硃批通省未霑雪澤皆我君臣因循疲玩不能感召
天和再不修省明歲必歉矣勉之

嘉慶二十一年五月十四日

奏據寶坻香河寧河懷柔密雲盧龍撫寧遷安臨榆昌
黎灤州樂亭故城東光滄州南皮廣宗鉅鹿平鄉
永年威縣曲周成安雞澤宣化龍門蔚州保安赤
城懷來西寧豐寧遵化玉田豐潤廣昌冀州衡水
新河南宮等四十州縣具報於五月初三四日得
雨一二三四五寸至深透不等昌平萬全棗強等

三州縣於五月初五日各得雨二寸朝陽縣於四
月二十三日得雨三寸各等情先後申報前來謹
奏奉

硃批欣慰覽之

嘉慶二十一年五月二十七日

奏保定省城於五月十四日得雨三寸又據龍門縣具
報於五月十六日得雨二寸又據寧河朔州永清
容城安州定興安肅盧龍灤州任邱寧津滄州青
縣鹽山正定靈壽新樂井陘晉州藁城清豐東明
趙州定州曲陽等二十五州縣具報於五月十三

四五等日得雨一二三四寸至深透不等又據大
城蠡縣新安東鹿撫寧東光吳橋阜城景州南皮
贊皇元氏樂城衡水武邑寧晉深州饒陽安平武
強等二十州縣具報於五月初九至初十日得雨
一二三四寸至深透不等平泉州於五月初六日
得雨三寸建昌縣於五月初四日得雨二寸各等
情先後申報前來謹

奏奉

硃批夏至日得雨五寸二十八九日大雨滂沛現尙未止
天恩深渥我君臣何忍不盡心民事乎

嘉慶二十一年六月初八日

奏據通州三河武清寶坻薊州香河寧河霸州大城固
安永清東安良鄉房山涿州昌平順義懷柔密雲
平谷清苑滿城安肅定興新城博野望都容城完
縣蠡縣雄縣祁州安州高陽新安河間獻縣阜城
肅寧任邱交河寧津景州吳橋故城東光天津滄
州南皮青縣靜海正定獲鹿井陘元氏藁城無極
阜平新樂晉州行唐沙河任縣鉅鹿廣宗平鄉南
和永年磁州雞澤邯鄲成安廣平威縣清河曲周
肥鄉大名元城開州清豐長垣東明南樂宣化萬

全懷來延慶保安遵化玉田豐潤易州冀州棗強
新河衡水南宮武邑趙州寧晉深州武強安平饒
陽定州曲陽深澤等一百八州縣具報於五月二
十七八九并六月初一等日得雨一二三四五寸
至深透不等遷安灤州盧龍等三州縣具報於五
月二十至二十一日得雨一二三寸西寧懷安二
縣具報於五月二十五二十七各得雨二寸平泉
赤峯豐寧等三州縣具報於五月十五六二十五
等日得雨二三寸各等情先後申報前來謹

奏奉

殊批欣慰覽之

嘉慶二十一年三月二十三日

奏

臣

於三月二十五日具奏公回日期一片欽奉

殊批二十四日香山微雨二十六日竟日沛然入土深透

三月中連沐甘膏實深欽感臣跪聆之下曷勝歡忭伏

查直隸地方自三月十二日普被甘霖之後甫逾

旬日近京一帶復得澍雨優沾不特二麥堪卜豐

收卽大田亦可布種此皆我

皇上至誠感格

昊眷丕昭故於一月之中連霑渥澤畿輔官民莫不同聲

感頌現據承德等府各具報三月十二等日得雨
五寸灤平縣得雨三寸豐寧縣得雨五寸盧龍縣
得雨一寸通州固安良鄉房山涿州懷柔昌平密
雲順義清苑定興雄縣新城安肅吳橋寧津阜平
曲周清河磁州永年成安肥鄉廣平邯鄲南樂東
明長坦清豐宣化延慶懷安赤城萬全保安懷來
西寧龍門易州涑水等州縣並張家口廳獨石口
廳得雨一二三四五寸等情前來謹

奏奉

硃批欣慰覽之初四日密雨竟日現尙未止

嘉慶二十一年三月二十五日

奏臣於二十二日跪送

聖駕後卽於二十四日回省經過宛平良鄉涿州定興安肅清苑等州縣自本月十二日得雨之後麥苗出土青葱大田亦有翻犁布種地方安謐民氣恬舒洵足仰慰

聖懷謹

奏奉

硃批二十四日香山微雨二十六日竟日沛然入土深透
三月中連沐甘膏實深欽感

那文毅公初任直隸總督奏議卷四十四